



**Sillimmasiisarfimmik, assigisaannillu aningaasaateqarfimmik, kalaallinik tamakkiisumik amerlanerussuteqartunilluunniit pigineqartussamik pilersitsinissamut periarfissanik misussuisoqarnissaanut, Kalaallit Nunaata iluani aningaasaliinerulernissaq siunertaralugu, Naalakkersuisut peqquneqarnissaannut Inatsisartut aalajangiiffigisassaattut siunnersuut. Misissuineq Inatsisartunut ukioq 2025 aallartinnerani agguanneqassaaq.**

(Inatsisartunut ilaasortaq Jens Napaattooq, Naleraq)  
(Siullermeerneqarnera)

Qujanaq siunnersuummut.

Demokraatit ersarissumik isumaqarput, Namminersorlutik Oqartussat niuerneramik ingerlataqassanngitsut. Namminersorlutik Oqartussat nunap ingerlannera aqunneralu aallutissavaat – suliffeqarfinnik ingerlatsinani namminersorlutik inuussutissarsiortunut unammillerluni. Ukiut ingerlanerini ajoraluartumik takusarparput arlalippassuariarlutik, pisortat namminersorlutik inuussutissarsiuteqartunut unammillernerat. Tamanna sapinngisarput tamaat pinaveersaartissavarput. Tamanna siullertut naqissuserumavarput.

Nunarput namminersortunik suliniuteqartussanik aammalu suliffeqarfinnik namminersortunik inuussutissarsiuteqaratunik amerlanernik pisariaqartitsisoq. Suliffeqarfinnik pisortanit pigineqartunik amerlanernik pisariaqartitsisoqanngilluinnarpoq. Pisariaqartinneqanngilluinnarportaaq pisortat pigisaannik suliffeqarfinnik pilersitsineq, namminersortunit ingerlalluurtunit ingerlanneqareersuni. Aamma tassunga ilaapput, sillimmasiisarfiit.

Sillimmasiisarfiit aningaasartuutit naatsorsuutigisimangisat annertoorsuit suliarisarpaat, soorlu pinngortitami ajunaarnersuaqarneratigut, napparsimanikkut pisunilu allatigut, annertoorsuarmik taarsiivigineqarnissamik pisariaqartitsiviusunut. Sillimmasiisarfiup aarlerissutigineqartut taakku pitsaasumk suliarisinnaanngippagit, ingerlatsisussat piginnittuusut ajutuussapput aningaasaliissutaasimasullu aallartisarnermi annaaneqassallutik.

Ullumikkut sillimmasiisarfimmik ammaanissaq kikkunnulluunniit periarfissaavoq. Nunatsinni arlalinnik sillimmasiisarfeqarpugut, maanilu inersuarmi inatsisinik akuersinuuvgut sillimmasiisarnermi unammilleqatiinneq qulakkearniarlugu nunat avataaneersut aamma sillimmasiisinaanissaat.

Ullumikkut periarfissaareenera tunngavigalugu nalunaarusiortitsinissaq sillimmasiisarfimmik pilersitsinissamut isumassaqartippallaanngilarput. Aap aningaasaq nunatsinni kaaviiarnerulernissaa aqqtissiunnarli sutigut tamatigut, tamanna misissortigu.

Taasisutissaq aallaavigalugu Demokraatini isummorsorpugut tamannalu tunngavigalugu itigartinneqarnissaanut innersuussilluta.